

# ገገገገገገገገ 119

Wo blàa vi yu àmbò rraa nè ma mḡkùu wa'a

*Alèf*

- <sup>1</sup> Mmböḡtu mi yu nè bèe ce yap ḡgèe yi yu kùyee,  
à ba bèe ce a ce jèr àmbò ncir Yawè yi ce làa.
- <sup>2</sup> Mmböḡtu mi yu nè bèe ce a yu'ni nè Vi mncir,  
à ba bèe ce a ce ròo ye nè yap ntee—ḡwè.
- <sup>3</sup> Wowèe a ke gèe yu bebep ka' foḡ,  
ku ce jèr ba àmbò Yawè ce làa.
- <sup>4</sup> Yawè, wè fa wo mncir ene  
a le vi yeeni.
- <sup>5</sup> M ce kòḡ à rce yu'ni  
nè wo mncir à nfè' wèewè,
- <sup>6</sup> M ka' le mmir mbendùu wo mncir,  
banè rìtu yi be koo mè ka'.
- <sup>7</sup> M be nèsi wè nè ntee rara,  
mbe nfè' ce mè ye'ni wo mncir ce vi yu kùyee.
- <sup>8</sup> M be lè wo mncir,  
fa mà'shi mè dùdù ka'.

*Bèt*

## Yu'ni nè mncir Yawè

- <sup>9</sup> Àde' muu nsùnsù cu rcu rrara à njèe ke?  
Àde' e cu à njèe njì ce e ce yu'ni nè wo blàa.
- <sup>10</sup> M ce ròo wè nè ya ntee—ḡwè,  
fa mà'shi tē m lè'ti enje wo mncir ka',
- <sup>11</sup> Mè lèe wo blàa njep mē ntee,  
fà di' m bo gèe yuu bebep nè wè ka'.
- <sup>12</sup> Oo Yawè, m ce nèsi wè,  
ye'ni mè wo mncir.
- <sup>13</sup> M be suḡ bèe wo mncir  
ce wè fa wèewè.
- <sup>14</sup> M ce lu'shi à ryu'ni nè wo mncir

caa àmbò m ce lu'shi nè ku' buu ce mè tur.

<sup>15</sup> M be ce kwà'shi àmbò wo mncir  
ce jèr àmbò wè ce kòn enè m jêr.

<sup>16</sup> M be lu'shi à wo mncir,  
kè' lèsi wo blàa ka'.

*Gemèl*

### **Rbòŋ ce li yu njep mncir Yawè**

<sup>17</sup> Gèe bònboŋ nè mè ce yò ŋwè rfà',  
tè m bo cu, ce yu'ni nè wo blàa.

<sup>18</sup> Mù' ma mmir tè m bo yè  
buu bbèè ce vi yu njep yo ncir.

<sup>19</sup> M yu ŋkèè mbe tunshè,  
fa sùrti wo mncir ese mè ka'.

<sup>20</sup> Ya ntee yi ce lùute  
à rriŋ wo mncir à nfè' wèewè.

<sup>21</sup> Wè ke lapni ŋgàa nàa nyor ce ndòo à co' wowèe,  
à ba bèe ce a lè'ti efa wo mncir.

<sup>22</sup> Fa mà'shi tè wowèe a ce cep mè kèr ce vùshi mè ka',  
njobè' mè yu'ni nè wo mncir.

<sup>23</sup> Ka' boo mnlii a cu mncù nè mè wa'a,  
yò ŋwè rfà' be kù ce kwà'shi àmbò wo mncir.

<sup>24</sup> M ce lu'shi nè wo mncir,  
vi ke cep mè.

*Dalèt*

### **Fa ntee à ryu'ni nè mncir Yawè**

<sup>25</sup> Mè tæe yĩ ŋkwe,  
kusi la ryòŋ àmbò wè làa!

<sup>26</sup> À m ba mbe nfè' ce mè m suŋ wè àmbò ya ŋgèe, wè beesì mè.  
Yè'ni mè wo mncir!

<sup>27</sup> Jà' mè tè m riŋ yuu ce wo mncir vi ce làa,  
tè m bo ce kwà'shi àmbò mo mmfà' ce mghagha'.

<sup>28</sup> Mlù mi ce sèesi mè,  
fa mè ŋger àmbò wè làa!

<sup>29</sup> Fèesi mè efa ŋgèe mmbo'ni,

tur ntee bònbon nè mè, ye'ni mè wo mncir.

<sup>30</sup> Mè ce à rba mini,  
mè fa bfee nje wo mncir.

<sup>31</sup> Oo Yawè, mè ghashi wo mncir,  
fa mà'shi te ritu yi koo mè ka'.

<sup>32</sup> M be ce yu'ni nè wo mncir,  
njobè' à be gèe te m riñ vi.

*Hê*

### **Rloo enε Yawè ja' ηwè te e riñ Vi mncir**

<sup>33</sup> Oo Yawè, ye'ni mè yuu ce wo mncir vi ce làa,  
te m le vi dù bà' àlùsimbùu.

<sup>34</sup> Gèe te m riñ yuu ce wo mncir vi ce làa,  
te m bo lè vi ce yu'ni àgho nè ya ntee—ηwè.

<sup>35</sup> Càñsi mè te m jer àmbò wo mncir vi ce làa,  
njobè' vi gèe m ce lu'shi.

<sup>36</sup> Gèe te m le ntee njep wo mncir,  
ke' ba njep se' cici ka'.

<sup>37</sup> Fa mà'shi te m fa bfee njep buu bcici ka',  
gèe te m cu ntèe àmbò wè làa.

<sup>38</sup> Ruusi mo mñkà'ni nè mǎ yò ηwè rfà',  
te a bo wεp wè.

<sup>39</sup> Cà'si mncεp ce m ce wεp embe mǎ ndùu,  
njobè' wo mncir vi bòn.

<sup>40</sup> Yê, mè shee wo mncir,  
fa mè ryõñ rfi njobè' à yu nrara.

*Vâv*

### **Fa nè bfee nè ncir Yawè**

<sup>41</sup> Oo Yawè, dùñshi mè lo rkòñni ce nfesè,  
ja' mè àmbò wè ka'ni nà,

<sup>42</sup> te m bo tur yuu ce m be bèesi ηwè ce e ce cεp mè,  
njobè' mè fa bfee nè wo blàa.

<sup>43</sup> Fa fur làa ce mini eku mǎ cùu wàwà ka',  
njobè' mè fa bfee njep wo mncir.

<sup>44</sup> M be kù ce yu'ni nè wo mncir,

- à nfesè ba à nfesè,  
<sup>45</sup> ce jèr wàrwàr,  
 njobè' m ce ghèter à ryu'ni nè wo mncir.  
<sup>46</sup> M be suŋ àmbò wo mncir kùntombì nè bkũũ,  
 kè' koosi rìtu ka',  
<sup>47</sup> njobè' m ce yu' rbòŋ nè wo mncir  
 ce mè kòŋ.  
<sup>48</sup> M be nàa ma mmbo mbekì nè buu ce wè làa ce mè kòŋ,  
 ce kwà'shi àmbò wo mncir.

*Sàyîn*

### **Byemi nè ncir Yawè.**

- <sup>49</sup> Kuushi yuu ce wè m làa nè yò ŋwè rfà'.  
 Làa anà yi fa mè rkwà'shĩ rbòŋboŋ.  
<sup>50</sup> Yuu ce yi ce bòose mè à ma mlù yi yu ene  
 mo mŋkà'ni mi gèe mè ba ntèe.  
<sup>51</sup> Dgãa nàanyor a vùshi mè ke' ce borni ka',  
 geewa'a, mè ke' borni efa ryu'ni nè wo mncir ka'.  
<sup>52</sup> Oo Yawè, mɛ ce kwà'shi àmbò wo mncir ce vi m ba elũuŋòŋ,  
 vi ce bòose mè.  
<sup>53</sup> Ntee yi ke ko' mè enjoo se njobè',  
 bɛe bbebeɓ ce a tètetu nè wo mncir.  
<sup>54</sup> Mɛ ke yòp wo mncir à byɛɛ,  
 a bdi' wɛɛwɛ ce mɛ ke cu.  
<sup>55</sup> Oo Yawè, mɛ ke kuushi lo rlii nètɔ'  
 ce lè wo mncir.  
<sup>56</sup> Yuu ce m ce yu' rbòŋ àgho yi yu ene  
 m ce lè wo mncir.

*Hêt*

### **Fa ntee nje mncir Yawè**

- <sup>57</sup> Oo Yawè, à yu yà,  
 mè kà'ni à ryu'ni nè wo blàa.  
<sup>58</sup> Mè loo mo mmbòŋntee nè ya ntee—ŋwè,  
 koosi mnse nè mè àmbò wè m kà'ni.  
<sup>59</sup> Mɛ kwà'shi àmbò ya ŋgèe yi yu,

beeŋger ce jèr ba àmbò wo mncir vi ce làa.

<sup>60</sup> M be cèεε à rlè wo mncir ka',  
càasi nfè' ka'.

<sup>61</sup> Ka' bée bbebep a lè'shi btaa nè mè wa'a,  
mè lèse wo mncir ka'.

<sup>62</sup> Mε lε' nè nteetα' ku'si wè,  
àtu wo mncir ce vi yu kùyεε.

<sup>63</sup> M yu ŋkar nè ŋwè wεεwε ce e ce wεp wè,  
a ce lè wo mncir.

<sup>64</sup> Oo Yawè, wè kòŋ bèe wεεwε embe tunshè.  
Yε'ni mè wo mncir!

*Têt*

### **Mncir Yawè vi yu à lulu sê**

<sup>65</sup> Oo Yawè, wè gèe bònboŋ nè yò ŋwè rfà',  
àmbò wè m làa.

<sup>66</sup> Yε'ni mè à rkwa'shi yuu bònboŋ ker fa mè bfee,  
njobè' mè byemi nè wo mncir.

<sup>67</sup> Mè m ce dà' tε mlù mi ka' vù nè mè,  
geewa'a, m ce yu'ni nè wo blàa sè'ni.

<sup>68</sup> Wè bòn, a ce gèe buu bbònboŋ.  
Yε'ni mè wo mncir.

<sup>69</sup> Ŋgãa nàanyor a ce yo' mè nè mnde',  
geewa'a, m ce lè wo mncir nè ya ntee—ŋwè.

<sup>70</sup> Wowèe a tèesi mntee àmbò mnfoonyàa ce mi sèeti wa'a,  
geewa'a, mε ke yu' rbòn nè wo mncir.

<sup>71</sup> Yi yu yεeni eŋε mlù mi m ba nè mè,  
tε m bo yε'ni wo mncir.

<sup>72</sup> Wo mncir vi yu à lulu nè mè,  
a caa gul ba silvα mncùkì.

*Yôd*

### **Mncir Yawè vi yu kùyεε**

<sup>73</sup> Wè m boo mè nè mo mmo a ke'ni mè,  
fa mè bfee tε m bo yε'ni wo mncir.

<sup>74</sup> Bèe ce a ce wεp wè a be yε mè lu'shi,

njobè' mè byemi nè wo blàa.

<sup>75</sup> Oo Yawè, mè rìṅ menε wo mncir vi yu kùyeε,  
a rìṅ menε wè fa mè ṅge' njo à yu mini.

<sup>76</sup> Bòose mè nè lo rkòṅni ce nfesè,  
àmbò wè m kà'ni mè ce yò ṅwè rfà'.

<sup>77</sup> Koosi mnse nè mè tε m bo cu ntèe,  
njobè' m ce yu' rbòṅ nè wo mncir.

<sup>78</sup> Gèe tε rìtu yi koo ṅgãa nàanyor njobè' wowèe a tee mnde' mbe mǎ  
tù.

À ka' ba yi àmbò mè, m be ce kwà'shi àmbò wo mncir.

<sup>79</sup> Mà'shi tε bèe ce a ce wεp wè a vu ye mè,  
tε wowèe a bo rìṅ buu ce wè làa enε wèr gèe.

<sup>80</sup> Mà'shi tε ya ntee yi ba rara kuu wo mncir,  
fà di' rìtu yi bo koo mè enε mè lè vi ka' ka'.

*Kâf*

### **Dwè ce loo enε Yawè ja' ye efa yi ṅgãa bbàa**

<sup>81</sup> M ce kè' menε à ja' mè,  
mè byemi nè wo blàa.

<sup>82</sup> Mǎ co'ni mmir à rye yuu ce wè kà'ni,  
a bipshi enê, “À be bòose mè ba à se'ke?”

<sup>83</sup> Ka' m yu àmbò ṅgùpmrù' ce a kèti à njemor wa'a,  
geewa'a, mè ke' lese wo mncir ka'.

<sup>84</sup> Mǎ yò ṅwè rfà', m be kè' wè bà' fε?  
À be sa' bèe ce a ce fa ṅge' nè mè à se'ke?

<sup>85</sup> Dgãa nàanyor a tuṅ bbè'tè nè mè,  
wowèe a ce cu àmbò wo mncir vi ce làa ka'.

<sup>86</sup> Wo mncir wεεwε vi yu mini,  
wowèe a tee mnde' mbe mǎ tù, jà' mè!

<sup>87</sup> Wowèe a ce seni cà'si mè embe tunshè,  
geewa'a, mè mà' wo mncir ka'.

<sup>88</sup> Mà'shi mè njo' lo rkòṅni ce nfesè,  
tε m bo yu'ni nè yuu ce wè làa.

*Lamèd*

### **Rbyemi enjep mncir Yawè**

- <sup>89</sup> Oo Yawè, yuu ce wè làa,  
yi ku ba mini mbe bùu à nfè' wεεwε.
- <sup>90</sup> Yò mini ku ba àgho à nfè' wεεwε.  
Wè m gèe tunshè, yi ku tεε àmbò wè m gèe.
- <sup>91</sup> Wè m làa, buu wεεwε à ku ba àgho ba' ntini,  
buu anà wεεwε vi ce fà' nè wè.
- <sup>92</sup> Mè m ba tε bà kòṅ wo mncir ka',  
mè m ba kwe mbe nfè' mlù mi m ba nè mè.
- <sup>93</sup> M be kè lèse wo mncir ka',  
wè gèe mè cu ntèe njo' vi.
- <sup>94</sup> A mè yò, jà' mè,  
mè ghèter à ryu'ni nè wo mncir.
- <sup>95</sup> Běe bbelep a lè' mè tε a bo yu mè,  
geewa'a, m be ce kwà'shi ba àmbò wo mncir.
- <sup>96</sup> Mè ye menε buu wεεwε ce vi yu yεenì vi tūr nfè' ce vi be kè mì  
geewa'a, wo mncir vi be kè mì ka'.

*Mém*

### **Rkòṅni e nè mncir Yawè**

- <sup>97</sup> Oo njèe nji ce mè kòṅ wo mncir!  
Mε ke kwà'shi àgho à nfè' wεεwε.
- <sup>98</sup> Wo mncir vi ke gèe m tūr bfee caa ya ṅgǎa bbàa,  
njo' vi ke kù ce ba njep mè.
- <sup>99</sup> Mè riṅ buu a caa ya ṅgǎa ryε'ni wεεwε,  
njobè' mε ke kwà'shi àmbò wo mncir.
- <sup>100</sup> Mè riṅ buu a caa blebèe,  
njobè' m ce lè wo mncir.
- <sup>101</sup> Mè kani à rgèe ṅgěe bebep,  
tε m bo yu'ni nè wo blàa.
- <sup>102</sup> Mè lε'ti efa wo mncir ka',  
njobè' wè m ye'ni mè vi.
- <sup>103</sup> Wo blàa vi lèe nè mè ba à njèe,  
vi lèe a caa blù!
- <sup>104</sup> Wo mncir vi gèe mε riṅ buu,  
a mbùu ce mè bàa ṅgěe bebep wεεwε.

*Nûn*

## Rraa ce li yu njep mncir Yawè

- <sup>105</sup> Wo blàa vi yu àmbò lam ce e ke raa njep mǎ nduunji wa'a,  
a ba rraa njep mǎ rcènjì.
- <sup>106</sup> Mè kàa enɛ,  
m be lè wo mncir ce vi yu kùyeɛ, a tɛɛ njoo.
- <sup>107</sup> Mè ye ŋɛ' sê,  
oo Yawè, gèe tɛ m cu ntèe àmbò wè làa.
- <sup>108</sup> Oo Yawè, koo la rfa rnèsì ce m ce fa enjep mǎ ntee,  
ye'ni mè wo mncir.
- <sup>109</sup> Mɛ ke fa la ryòŋ à ŋɛ' à nfè' wɛɛwɛ,  
geewa'a, mè lèse wo mncir ka'.
- <sup>110</sup> Bèe bbebeɸ a lè' taa nè mè,  
geewa'a, mè fɯɯ enjep wo mncir ka'.
- <sup>111</sup> Wo mncir vi yu à lulu nè mè à nfè' wɛɛwɛ,  
njobè' vi gèe ya ntee yi ce lu'shi.
- <sup>112</sup> Mè fa ya ntee à ryu'ni nè wo mncir,  
nfesè, caar dù bà' àlùsimbùu.

*Samèk ɔ*

## Mncir Yawè vi ke tɛ'shi ŋwè

- <sup>113</sup> Mè bàa bèe ce a tur mntee bbaa,  
geewa'a, mè kòŋ wo mncir.
- <sup>114</sup> À yu ya dì' rsùnì, a ker ba ŋwè ce e ce tɛ'shi mè.  
Mè lè bfee njep yuu ce wè làa.
- <sup>115</sup> Wèe ce ŋgãa ŋgèe buu bbebeɸ, nàti nè efa mǎ geŋ,  
tɛ m bo yu'ni nè mncir yà Nyù.
- <sup>116</sup> Fa mè ŋger àmbò wè kà'ni, tɛ m bo cu ntèe.  
Fa gèe tɛ m lɛ bfee enɛ à be jà' mè tɛ rìtu yi lo koo mè ka'.
- <sup>117</sup> Tomi mè fà dì' yuu mo' yi bo jòo mè ka',  
tɛ m bo ce fa bfee njep wo mncir à nfè' wɛɛwɛ.
- <sup>118</sup> Wɛ ke jàasi bèe wɛɛwɛ ce a lɛ'ti enje wo mncir,  
njobè' wap bfee kwèe vi yu à cicì.
- <sup>119</sup> Wɛ ke mà' bèe bbebeɸ embe tunshè wɛɛwɛ àmbò dòti wa'a,  
a mbùu ce mè kòŋ wo mncir.
- <sup>120</sup> Mɛ ke kàŋni njobè' m ce wɛɸ wè,  
a ce wɛɸ wo mncir.

**Yu'ni nè mncir Yawè**

- 121 Mè gèe yuu ce yi yu kùyeε a ba yeεni;  
fa mà'shi mè nè bèe ce a ce nyù' mè ka'.
- 122 Kà'ni ene à be gèe bònboñ nè mè ce yò ñwè rfà', te'shi mè;  
fa mà'shi te ñgãa nàanyor a nyù' mè ka'.
- 123 M ce kè' wè ene à be jà' mè,  
ruusi mo mñkà'ni ce mi yu kùyeε.
- 124 Gèe nè yò ñwè rfà' àmbò lo rkòñni ce nfeε li yu,  
ker ye'ni mè wo mncir.
- 125 A mè yò ñwè rfà', fa mè bfee,  
te m bo riñ wo mncir.
- 126 Oo Yawè, nfè' à gheε ce wè ba gèe yuu,  
ñjobè' a bu' wo mncir.
- 127 Mè kòñ wo mncir a caa gûl,  
a caa gul ce e bòn sê.
- 128 A mbùu ce mè lòr wo mncir wεεwε ene vi yu yeεni,  
a baa ñgèe ce yi yu ñjìnji.

**Mè fa ntee à ryu'ni nè mncir Yawè**

- 129 Wo mncir vi yu bghagha',  
a mbùu ce m ce yu'ni àgho.
- 130 A ke nàshi wo blàa vi fa rraa,  
gee bèe ce a riñ yuu ka', a tur bfee.
- 131 Mè mù' cùu a ce yònse àmbò ñgwe wa'a,  
ñjobè' mè kòñ à rriñ wo mncir.
- 132 Bèeñger fyε' mè, koosi mnse nè mè,  
àmbò wε ke gèe nè bèe ce a kòñ lo rlii.
- 133 Kèñte la rjèr àmbò wè kà'ni,  
fa mà'shi te yuu bebep yi tur ñger mbe mē ndùu ka'.
- 134 Jà' mè embà mmo bèe ce a ce nyù' mè,  
te m bo yu'ni nè wo mncir.
- 135 Gèe te wo bsii vi raa mbendù mè ce yò ñwè rfà',  
ker ye'ni mè wo mncir.

<sup>136</sup> M ce cù' mṅgoommir,  
njobè' bèe a ce yu'ni nè wo mncir ka'.

*Tsadè*

### **Mncir Yawè vi yu kùyeε**

<sup>137</sup> Oo Yawè, wè yu kùyeε,  
wo mncir vi ba yeeni.  
<sup>138</sup> Wè fa wo mncir njo' à yu kùyeε,  
a ba mini.  
<sup>139</sup> Ya ntee yi ce ko' mè enjoo,  
njobè' ya ṅgãa bbàa a lèse wo blàa.  
<sup>140</sup> A taase mo mṅkà'ni mi ba mini,  
yò ṅwè rfà' à koṅ mmi.  
<sup>141</sup> M yu yuu ka', bèe a jaasi mè,  
geewa'a, mè lesè wo mncir ka'.  
<sup>142</sup> À yu kùyeε à nfè' wεεwε,  
wo mncir vi ba mini.  
<sup>143</sup> Mè yu à ṅge', a ba à mlù,  
geewa'a, m ce lu'shi nè wo mncir.  
<sup>144</sup> Wo mncir vi yu kùyeε à nfè' wεεwε,  
fa mè bfee te m riṅ vi te m bo cu ntèe.

*Kôf*

### **Ɖwè ce war ene Yawè ja' ye**

<sup>145</sup> Oo Yawè, m ce war nè ya ntee—ṅwè, bèesi mè!  
M be yu'ni nè wo mncir.  
<sup>146</sup> M ce ke' wè, jà' mè,  
te m bo yu'ni nè wo mncir  
<sup>147</sup> Mε ke le' te tù' ka' raa, war nè wè ene à ja' mè.  
Mè lè bfee nje yuu ce wè làa.  
<sup>148</sup> Mε ke lò ke'se nè nteetu',  
te m bo ce kwà'shi àmbò mo mṅkà'ni.  
<sup>149</sup> Yu' yà njendonṅ njo' lo rkòṅni ce nfesè.  
Oo Yawè, gèe te m cu ntèe njo' wε ke sa' kùyeε.  
<sup>150</sup> Bèe ce a ce ghoo ntaṅ mbembep a vù àtutu nè mè,  
wowèe a ce yu'ni nè wo mncir ka'.

<sup>151</sup> Oo Yawè, ka' yi yu wa'a, à yu àtutu nè mè,  
wo mncir wεεwε vi yu mini.

<sup>152</sup> Mè m rìṅ yuu ce wo mncir vi làa ke' elüṅgòṅ  
enε wè m gèe vi enε vi ba nfesè.

*Rêsh 7*

### **ገwè ce war enε Yawε ja' ye efa yi ṅǎa bbàa**

<sup>153</sup> Fyε' yà ṅε', ja' mè  
ṅjobè' mε ke lèse wo mncir ka'.

<sup>154</sup> Sa' yà nsa' nè mè, ja' mè,  
gee tε m cu ntèe àmbò wè kà'ni!

<sup>155</sup> Rjà' rli yu nè bée bbebeṅ ka',  
ṅjobe' wowèe a ke fa bfee nè wo mncir ka'.

<sup>156</sup> Oo Yawè, yò ṅkoosimnse yu gòr,  
gèe tε m cu ntèe àmbo wo mncir vi làa.

<sup>157</sup> Bèe ce a ce fa mè ṅε' ker ba bèe ce a bàa mè a yu gòr,  
geewa'a, mè ke' fūu enjep wo mncir ka'.

<sup>158</sup> Mε ke fyε' bèe ce a byemi ka' yi ce ko'ni mè,  
ṅjobè' wowèe a ke yu'ni nè wo mncir ka'.

<sup>159</sup> Yε àmbò mè kòṅ wo mncir,  
gèe tε m cu ntèe njo' lo rkòṅni ce nfesè.

<sup>160</sup> Wo blàa wεεwε vi yu mini,  
wo mncir wεεwε vi yu kùyεε, a ba nfesè.

*Sin ba Shîn*

### **Fa nyor nè mncir Yawè**

<sup>161</sup> Bèe ce ṅger yi yu nè wowèe a fa mè ṅε' à cici,  
geewa'a, ya ntee yi ce kàṅni njo' wo blàa.

<sup>162</sup> M ce lu'shi nè wo blàa.  
àmbò ṅwè ce e kwè' lulu buu efa ṅkù bìr wa'a.

<sup>163</sup> Mè bàa mnde', a jaasî,  
geewa'a, a koṅ ba wo mncir.

<sup>164</sup> Mε ke nèsi wè ṅkàrà' sàamba njep nòṅtu',  
ṅjobè' wo mncir ce vi yu kùyεε.

<sup>165</sup> Bèe ce a kòṅ wo mncir a ke tur cumunyaṅ ce e yu gòr,  
àde' yuu mo' yi gee wowèe a kotè ka'.

- <sup>166</sup> Oo Yawè, m ce kè' mɛɛ à ja' mè,  
a ce yu'ni nè wo mncir.  
<sup>167</sup> Mɛ ke yu'ni nè wo mncir,  
a koŋ vi ba à sê.  
<sup>168</sup> Mɛ ke yu'ni nè wo mncir ba buu ce wè làa,  
njobè' wè riŋ buu ce mɛ ke gèe wɛɛwɛ.

*Tâv*

### **M ce loo enɛ Yawè ja' mè**

- <sup>169</sup> Oo Yawè, yu' la rwar!  
Gèe tɛ m riŋ buu àmbò wè làa nà.  
<sup>170</sup> Yu' la rloo,  
ja' mè àmbò wè làa nà.  
<sup>171</sup> M be cù' yòp nèsi wè.  
njobè' wɛ ke ye'ni mè wo mncir.  
<sup>172</sup> M be yòp àmbò wo blàa,  
njobè' wo mncir vi yu kùyɛɛ.  
<sup>173</sup> Tami nyor à rjà' mè,  
njobè' mè ce wo mncir.  
<sup>174</sup> Oo Yawè, m ce kè' enɛ à ja' mè,  
a ce lu'shi nè wo mncir.  
<sup>175</sup> Mà'shi tɛ m cu ntèe ce nèsi wè,  
gèe tɛ wo mncir vi ja' mè.  
<sup>176</sup> Mè dà' àmbò njèe ce e bu wa'a,  
rò mǎ yò ŋwè rfà'  
njobè' mɛ ke lèse wo mncir ka'.